



**Convenio entre a Consellería de Cultura, Educación e Ordenación Universitaria e a Fundación Laboral de la Construcción para o recoñecemento da formación preventiva impartida nos centros públicos, dependentes desta Consellería, para os efectos da obtención da tarjeta profesional de la construcción**

En Santiago de Compostela, once de setembro de dous mil doce

**REUNIDOS**

Dunha parte, don Jesús Vázquez Abad, conselleiro de Cultura, Educación e Ordenación Universitaria da Xunta de Galicia, nomeado polo decreto 9/2012, do 3 de xaneiro, en virtude da competencia atribuída polo artigo 34.1 da Lei do Parlamento de Galicia 1/1983, do 22 de febreiro, reguladora da Xunta e do seu Presidente.

E doutra, don Hipólito Trinidad Losada, Presidente da Fundación Laboral de la Construcción de Galicia, por acordo tomado na reunión da Comisión territorial da Fundación Laboral de la Construcción, consello territorial de Galicia, celebrada o día 2 de xuño de 2010, actuando como representante legal da mesma.

As partes intervenientes, actúan en virtude dos seus respectivos cargos e se recoñecen plena capacidade para subscribir o presente convenio,

## **EXPOÑEN**

1. Que entre as competencias que en materia educativa lle corresponden a esta Comunidade Autónoma conforme ao establecido no artigo 29.1 do Estatuto de Autonomía de Galicia, está o regulamento e administración do ensino en toda a súa extensión, niveis e graos, modalidades e especialidades, no ámbito das súas competencias, tendo atribuído o seu exercicio a Consellería de Cultura, Educación e Ordenación Universitaria de conformidade co establecido no decreto 45/2012, do 19 de xaneiro.

2. Que a Dirección Xeral de Educación, Formación Profesional e Innovación Educativa, o órgano encargado da xestión das competencias en materia de ordenación do ensino regrado en toda a súa extensión, niveis e graos, modalidades e especialidades; e así mesmo da potenciación da inserción profesional do alumnado que curse ensinanzas de formación profesional, do fomento do espírito emprendedor e do impulso das relacións entre os responsables da formación, do emprego e da produción, mediante plans de información e establecemento de convenios.

3. Que a Fundación Laboral de la Construcción de Galicia (en adiante FLC), é un organismo paritario que persegue un fin de interese público, vinculado ao “*Convenio Colectivo General del Sector de la Construcción*”. Así mesmo, é unha entidade sen ánimo de lucro constituída polas entidades máis representativas do sector: *Confederación Nacional de la Construcción (CNC)*, *Federación Estatal de Construcción, Madera y Afines de Comisiones Obreras (FECOMA-CCOO)* e *Metal, Construcción y Afines de la Unión General de Trabajadores (MCA-UGT)*. A súa finalidade primordial é crear un marco de relacións laborais estables e xustas e prestar servizos aos traballadores e empresas.

Tal e como consta nos seus estatutos, os seus principais obxectivos son o fomento da formación profesional, a investigación, o desenvolvemento e a promoción de actuacións tendentes á mellora da saúde laboral e á seguridade no traballo, así como a promoción de actuacións dirixidas á mellora do emprego.

4. Que a formación profesional que se imparte nos centros públicos, dependentes Consellería de Cultura, Educación e Ordenación Universitaria, inclúe, ademais da obtención do

certificado de nivel básico en prevención de riscos laborais, unha formación específica en prevención de riscos laborais propios de cada profesión.

5. Que o V Convenio Colectivo Xeral do Sector da Construción no punto 2 do seu artigo 136, principios xerais, estipula que as accións e actuacións a realizar en relación cos contidos da Lei 31/1995, de 8 de novembro, de prevención de riscos laborais no sector da construción e a Lei 32/2006, de 18 de outubro, reguladora da subcontratación no sector da construción, teñen que ser análogas, homoxéneas e coordinadas en todo o territorio nacional. Á FLC correspóndelle ser o fío condutor dos principios e directrices a desenvolver nos programas formativos e contidos específicos de carácter sectorial e para os traballos de cada especialidade, a fin de que de forma equivalente se establezan os mesmos niveis de aplicación e cumprimento en cada un dos Consellos Territoriais.

Asemade, no punto 1 do artigo 167 establécese que a Tarjeta Profesional de la Construción (en adiante TPC) é o documento expedido pola FLC que constitúe unha forma de acreditar, entre outros datos, a formación específica recibida do sector polo traballador en materia de prevención de riscos laborais, así como a categoría profesional do traballador e os períodos de ocupación nas distintas empresas nas que vaia exercendo a súa actividade.

En consecuencia, as partes asinantes consideran axeitado facer operativa e recíproca a colaboración mediante o presente convenio de colaboración e de acordo coas seguintes,

## **CLÁUSULAS**

### **Primeira. Obxecto**

O presente convenio ten como obxecto a colaboración entre a Consellería de Cultura, Educación e Ordenación Universitaria e a Fundación Laboral de la Construción para a expedición da Tarjeta Profesional de la Construción aos titulados en formación profesional inicial.

### **Segunda. Ámbito**

Este convenio será de aplicación no ámbito xeográfico da Comunidade Autónoma de Galicia.

### **Terceira. Actuacións das partes**

A colaboración que inspira o presente convenio, que non ten contido económico, farase efectiva mediante o desenvolvemento das accións consistentes en:

A Consellería de Cultura, Educación e Ordenación Universitaria comprométese a que:

- A formación que se imparta nas especialidades relacionadas co sector da construción axustarase ás condicións establecidas no Libro II, Título 3 do V Convenio Colectivo Xeral do Sector da Construción.
- Os diplomas ou certificados de formación expedidos polo director ou directora do centro público que corresponda, de acordo co contido formativo que se imparta, farán referencia ao artigo que corresponda do mencionado Libro II, Título 3 do Convenio Colectivo Xeral do Sector da Construción. Os diplomas ou certificados de formación se poderán expedir previamente ao acceso do alumnado aos correspondentes módulos de “Formación en Centros de Traballo”.
- Co fin de que a formación impartida sexa válida para os efectos da Tarjeta Profesional de la Construcción, a Dirección Xeral de Educación, Formación Profesional e Innovación Educativa incluírá nos diplomas ou certificados entregados o seguinte texto: “Formación recoñecida pola Fundación Laboral de la Construcción para os efectos da Tarjeta Profesional de la Construcción, en virtude do convenio asinado en Santiago de Compostela o once de setembro de 2012”.

A Fundación Laboral de la Construcción comprométese a:

- Admitir como válida a formación impartida polos centros educativos dependentes da Consellería de Cultura, Educación e Ordenación Universitaria e recollida no Libro II do V Convenio colectivo Xeral do Sector da Construción, e que poderá ser acreditada polo alumno ou alumna para os efectos do disposto no Libro II do V Convenio Colectivo Xeral do Sector da Construción respecto da obriga de formación en materia de prevención de riscos laborais e da Tarjeta Profesional de la Construcción.
- Validar ao alumnado que realice ciclos formativos da familia profesional “Edificación e obra civil” nos centros educativos dependentes da Consellería de Cultura, Educación e Ordenación Universitaria, o cumprimento do requisito de

experiencia establecido no artigo 170, puntos 2 e 5 do V *Convenio General del Sector de la Construcción* para acceder á solicitude da TPC, dado que no transcurso de cada un dos ciclos formativos, os alumnos e alumnas realizan o módulo denominado “Formación en Centros de Trabajo” (FCT) cunha duración superior a un mes.

Na difusión de todas as accións que se poñan en marcha para o desempeño do presente convenio (publicidade, comunicación, información, folletos, etc.) figurará, de forma expresa, o logotipo da Xunta de Galicia.

#### **Cuarta. Vixencia**

O convenio entrará en vigor na data da súa sinatura e terá unha vixencia de dous anos, podendo prorrogarse por acordo das partes mediante a addenda correspondente. Non obstante, o convenio poderá denunciarse por calquera das partes. Esta denuncia será formulada de forma fidedigna con dous meses de antelación.

#### **Quinta. Comisión mixta de seguimento**

Constitúese unha comisión mixta para o seguimento do convenio, formada polo Director Xeral de Educación, Formación e Innovación Educativa ou persoa na que delegue e un funcionario da Dirección Xeral de Educación, Formación Profesional e Innovación Educativa designado polo anterior, o presidente da Fundación Laboral de la Construcción en Galicia ou persoa na que delegue e un técnico/a designado por el. Esta comisión exercerá principalmente as seguintes funcións:

- Consenso dos plans de traballo e accións específicas a realizar.
- Interpretación e resolución de cantas dúbidas ou conflitos se formulen na interpretación do presente convenio e a súa aplicación.
- Vixilancia e seguimento do seu cumprimento.
- Aquelas outras que, para o efecto, se lle encomenden.

#### **Sexta. Carácter administrativo do convenio**

O presente convenio de colaboración posúe carácter administrativo por razón do contido e materias sobre as que o mesmo versa, as cales ao abeiro do disposto no artigo 4.1 e 2, do Real Decreto Lexislativo 3/2011, de 14 de novembro, polo que se aproba o texto refundido da Lei



de Contratos do Sector Público, o exclúe do seu ámbito de aplicación, sen prexuízo da aplicación dos principios desta para resolver as lagoas ou dúbidas que a súa aplicación suscite.

Dada a natureza administrativa deste instrumento xurídico, as controversias ou cuestións litixiosas que puideran xurdir na súa aplicación e non puidesen ser solucionadas no seo da comisión de seguimento, serán resoltas pola xurisdición contencioso-administrativa.

### **Sétima. Extinción ou resolución do convenio**

Son causas de extinción ou resolución do presente convenio:

- a) O incumprimento por calquera das partes das súas cláusulas.
- b) A alteración substancial das condicións que propiciaron a súa celebración.
- c) Por resultar inviable a realización das actuacións descritas neste convenio por causas non imputables ás partes.
- d) O mutuo acordo.
- e) As modificacións na normativa relativa á expedición da tarjeta profesional de la construcción que faga este convenio ineficaz.

En caso de extinción ou resolución do convenio, calquera que fose a súa causa, as actuacións ás que ven referido o seu texto, e que no momento da resolución ou extinción se atoparan en curso de realización, continuarán o seu desenvolvemento ata a súa finalización.

Lido o presente convenio, atópano conforme e asínano na lugar e data indicados.

**O Conselleiro de Cultura, Educación  
e Ordenación Universitaria**

**O presidente da Fundación Laboral de la  
Construcción de Galicia**

**Jesús Vázquez Abad**

**Hipólito Trinidad Losada**